

## ԱՐԳԱՐ ԱՂԱՅԻ ՏՈՒՆԸ



Այդ տան գոյության մասին առաջին վկայությունը եւ տեսա կարսնցի Արտաշէս Ալեքսանդրյանի «Մղձավանջ» հուշերի գրքում: Այնտեղ գետնոված լուսանկարում հետևյալ մակագրությունը կա. «Կարսի Երկաթյա կամուրջը, (Կենտրոնի երկարավուն շենքին անմիջապէս հաջորդող շենքը (աջից) Աբգար-Աղայի (Չարենցի հոր) տունն է»:

Գյուտ արածի ոգևորությամբ եւ այդ մասին պատմեցի Մարտին Թադևոսյանին: Նա իմ ոգևորության վրա ընկերաբար ու մտերիմ ժպտաց և առաջարկեց միանալ ուխտավորների՝ իր առաջնորդությամբ Կարս մեկնողների խմբին: Պարզվեց՝ Կարսում Եղիշն Չարենցի հայրական տունը գտնելու խնդիրը Մարտինի երկար տարիների փափագն է եղել, և նա համառորեն, անհոգնել ու անփառ շարունակել է որոնումները, փաստեր հավաքել, մի շարք անգամներ գնացել Կարս:

Մարտինը Կարսում շատ ծանոթներ ունի: Նրանցից մեկը Ալիջանն է, ով ղեկավարում է Կարսի հեռուստաընկերությունը: Ալիջանի ավագ եղբայրը Կարսի քաղաքապետն է:

Ահա այս երկու անձնավորությունները՝ Նաիֆ և Ալիջան եղբայրները, շատ օգնեցին Մարտինին՝ գտնելու Չարենցի հայրական տան ճիշտ հասցեն: Քաղաքապետը հանձնարարական էր տվել արխիվային նյութերը հանել, Ալիջանը՝ իր ղեկավարած հեռուստաընկերության թղթակիցների միջոցով, Աբգար աղայի տան խնդրով, հնաբնակ կարսնցիների շրջանում հարցազրույցներ անցկացրել:



## ՉԱՐԵՆՅԻ ՈՏՆԱՀԵՏՔԵՐԻ ՓՆՏՐՏՈՒՔԸ

«Վաղու՛ց, վաղու՛ց մտորում է իմ մեջ  
մի անհուն ցանկություն: Վաղուց ելք է փնտրում կուտակված մի կարոտ»: **Ե. ՉԱՐԵՆՅ**



Ուխտավորների առաջին այցելությունը Կարս, այսպես ասած, ճանաչողական էր: Ճանաչողական ոչ Մարտինի համար, այլ՝ ուխտավորների: Ճանապարհորդությունը նվիրված էր Եղիշե Չարենցի ծննդյան օրվան: Մինչ այդ, այժմ արդեն Ազգային ժողովի փոխստանակի իրավաստրիդատու Մարտին Թադևոսյանը, մի քանի անգամ եղել էր Կարսում՝ արդեն զուտ Չարենցի հայրական տան հասցեն ճշտելու համար: Իր սովորությունն է՝ ճշգրիտ, հազար անգամ ստուգված ու անխցելի փաստերի առկայության պայմաններում միայն եզրակացության հանգել: Եվ նրբ համոզվեց, որ Կարսի Էրզրումի փողոցի թիվ 100 հասցեում է խնդրո առարկա տունը, սկսեց պատրաստվել հերթական այցին՝ այս անգամ ուխտավորներ առաջնորդելով Կարս՝ պոետի ծննդյան 108-ամյա հոբելյանը նշելու նրա հայրական տանը:

Խենթի՞ ծրագիր էր, »հին ու աստղային նրագների ճանապարհը« բռնած խելագարի՞ քայլ, որ Չարենցի ոտնահետքերը գտնելու հույսով՝ մամուռներում կորած արահետն է փորձում վերաբացել:

Այդպես, Երևանում, հուշաքարի մոտ, Կարսի իր տունը գնալու »իրավունքն ուզեցինք« Չարենցից:

Թե այստեղից ձեռքերս մեկնենք՝ Կարսն է: Բայց մենք՝ այդ երկրի հետ սահմանադուռ չունեցողներս, 500 կիլոմետրանոց պտույտը պիտի անեինք, որ հասնեինք Կարս և Չարենցի »մնաս բարով«-ը սուկ ցտեսություն համարելով՝ շվար կանգնեինք »գետի ափին անտաշ քարով շինված« նրա մանկության տան դռանը:

Տունը այնքան էլ տուն չէր. նրբեմնի նրկհարկանի շենքի վերին հարկը քանդված էր, առաջին հարկ ասածն էլ խարխուլ պատերն էին՝ առանց ծածկի: Ներսը՝ բաց նրկնքին ի տես, կեղտաջրով լցված: Մուտքի հնաբույր դուռը կար, որը պահպանելու որևէ բան չուներ:

Բայց սա Չարենցի՛ հայրական տունն էր, նթե անգամ որմից մի ծիվ միայն մնացած լիներ, էլի Չարենցի տունն էր:

Լիլիկը տարակուսեց, թե՛ Երևանի Չարենցի անվան թանգարանի բակից բերած հողը որտե՞ղ շաղ տա՝ գուցե մուտքի դռան առաջ, ուր արդեն խմբվել են ուխտավորները՝ տեղ բացելով հատկապես գեղանկարիչ Ստեփան Անդրանիկյանի համար, ով իր կերտած Չարենցի յուղաներկ դիմանկարը ձեռքին մոտենում էր, որ մի պահ կանգնի դռան մոտ և այդ ֆոնին լուսանկարվի:

Մենք շարժում էինք անցնող-դարձողի հետաքրքրությունից մեզ շրջապատողների զարմանքը. «Սրանք այդ ի՞նչ են փնտրում այս խարխուլ տան դռան, պատերի վրա ու այդ անխնամ բակում»: Նրանց ի պատասխան ուզում էինք բարձր, շատ բարձր ձայնել՝ «Ոտնահետքե՛ր ենք փնտրում, ոտնահետքե՛ր ու մատնահետքե՛ր...»:



Երեկոյան, արդեն հյուրանոցում, նկարը հանդիսավոր կախեցինք ռեստորանի սրահի պատից, «Չարենց-108» տորթն էլ նկարի տակ:

Պահն էր պատեհ, որ Երգահան Սասուն Պասկևիչյանը ձայներ Չարենցի տաղերով գրած իր երգերը, որին ուխտավորներս բոլոր ձայնակցեցինք, ու երեկոն լցվեց չարենցյան տաղերով, չարենցյան երգերով: Սասունը Չարենցի տուն գալու «մուտքի վիզան» էն գլխից ուներ. պոետի տաղերով գրված նրա մի շարք երգեր հայ երգիչներից մի քանիսի համերգային ծրագրերից անբաժան են: Սասունը դատարկ չէր եկել՝ նա բերել էր իր երգերի ձայնագրությունները, և ամբողջ ճանապարհին ու կարսում անցկացրած օրերին մենք վայելում էինք Չարենցի տաղերի ունկնդրի ու նաև ձայնակցողի հաճելի բերկրանքը: Հաա՞րտ էր Սասունը, որ դրանց հեղինակն է, լա՞վ էր զգում, որ սիրված են իր երգերը: Թերևս: Բայց ավելի շուտ և ավելի շատ նա ուրախ էր, որ այս ճամփորդությունը նոր երգեր գրելու տրամադրություն ու ներշնչանք է բերում:

Չարենցի հայրական տան վիճակից եկող տրտմությունն աստիճանաբար անցնում էր, և մեր թախժոտ տրամադրությունն ուրախության երանգներ ստացավ՝ մեր հանպատրաստից երեկոն աշխույժ ու հետաքրքիր դարձնելով: Չարենցի տաղեր արտասանեցինք ու երգեցինք, երգեցինք ու արտասանեցինք՝ մի ողջ գիշեր «մեր պայծառացած խոհերով» արթուն մնալով... Չարենցի հետ: Որտեղից-որտեղ հիշեցինք Հովհաննես Ծիրազի տողերը. «Ծիրմն շիրիմ ես ձայն տալով, սուրբ հույսերով մեր թռչների՝ //Պիտի կյանքը թնդացնեմ կարսի իմ հին փողոցներում»:

Միջավայրը չարենցոտված էր, և նաիրյան երկրի հնամենի այդ քաղաքը մեզ այլևս պատկերանում էր չարենցյան ժամանակների տեսքով, և տունն այդ, որ առայժմ խղճով ու հնաբույր է, այլևս շքեղ մի շինություն էր, իր կամարի վրա ունեցած ցուցանակով՝ «Չարենցի

անվան մշակույթի տուն»:

Չարենցը մեզ հետ էր, և կարծես թե այն նույն ժամանակներն էին, երբ, Ավետիք Իսահակյանի խոհերի հանգույն՝ ծառերն այստեղ հայերեն էին սոսափում, թռչունները հայերեն էին ծլվում, առվակները հայերեն էին խոխոջում. ամեն քար ու իր, աստղ ու նրկինք հայերեն էին, հայկական, հայաշունչ: Եվ մենք էլ »Երկիր Նաիրի«-ի նորօրյա կերպարներ էինք՝ մեծ պոետի հիշատակի խնկարկումին եկած ուխտավորի զգացական կեցվածքով ու խոնարհումով:

Գիշերն այդ լուսավոր էր, խորհրդավոր էր, թափանցիկ ու մաքուր էր:

Հաջորդ օրը, առավոտ ծեղր-ծեղին, կրկին գնացինք Չարենցի տուն: Ճանապարհին Առաքելոց եկեղեցին էր ու Վարդանի կամուրջը, վերը՝ »խիստ, խոժոռ, որպես արևելյան քարն մի բռնակալ«, բերդն էր: Հետո Ալեքսանդրովսկին, որ հիմա Էրզրումի փողոց է կոչվում, ու այդ փողոցի վրա անշուք այս ավեր տունը՝ Չարենցի՝ տունը: Իսկական ողբերգություն կլինի այդ տունը թողնել այդ վիճակում: Սա արդեն նշանակում էր, որ ուխտը շարունակություն ունի, որ այս ուխտավորությունը սոսկ այցելություն և խնկարկում չէ, որ մենք նաև մեծ առաքելության ենք կոչված: Այս մասին՝ շարունակության մեջ: Իսկ մինչ այդ՝ գյումրեցի տղաների մեղմ նվագակցության տակ խմբովին արտասանենք.

»...Գորշ, տաղտկալի ու խելագար երգ է կարծես  
այս կյանքը մի.

Ինչ-որ մեկի սրտում բացված-վերք է կարծես  
այս կյանքը մի.

Եվ ո՞ւմ համար-էլ ու՞մ համար  
կարոտակեզ երգն հիմի

Սիրտս՝ լցված տարիների  
սեղմ արճիճով ու կապարով:

...Ու էլ ամեն մեղքի համար սիրտս հիմա ունի ներում.

Պիտի անդարձ ես հեռանամ, պիտի գնամ՝  
ա՛չքս է հեռուն...«:

*Շարունակելի*